



Broj:

Sarajevo, 04.11.2020. godine

PARLAMENTARNA SKUPŠTINA BOSNE I HERCEGOVINE  
PREDSTAVNIČKI DOM

n/r predsjedavajućeg, gđin. Nebojša Radmanović

PARLAMENTARNA SKUPŠTINA BOSNE I HERCEGOVINE  
SARAJEVO

PRIMLJENO:	05-11-2020		
Organizaciona jedinica	Klasifikaciona oznaka	Redni broj	Broj priloga
01	50-1	2172	20

Na osnovu člana 8. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19 i 26/20), podnosim

POSLANIČKU INICIJATIVU

kojom Predstavnički dom Parlamentarne skupštine Bosne i Hercegovine zadužuje Ministarstvo vanjske trgovine i ekonomskih odnosa Bosne i Hercegovine, da u roku od 60 dana od dana usvajanja ove inicijative, izradi i dostavi Vijeću ministara Bosne i Hercegovine na usvajanje prvi nacrt Integrisanog energetskog i klimatskog plana Bosne i Hercegovine (NECP), a što je obaveza ovog ministarstva iz Akcionog plana Vijeća ministara Bosne i Hercegovine za realizaciju prioriteta iz Analitičkog izvještaja Evropske komisije.

Obrazloženje

Evropska komisija je u maju 2019. godine objavila Mišljenje Komisije o zahtjevu Bosne i Hercegovine za članstvo u Evropskoj uniji. Ovo Mišljenje uslijedilo je nakon uspješnog odgovora na 3242 pitanja i 655 dodatnih pitanja iz Upitnika Evropske komisije. U dokumentu je još jednom potvrđena evropska perspektiva Bosne i Hercegovine i realizacija 14 prioriteta iz Mišljenja predstavlja suštinski korak u pravcu buduće integracije Bosne i Hercegovine u Evropsku uniju. Ništa manje važan nije ni prateći Analitički izvještaj, koji je dostavljen uz Mišljenje Evropske komisije i isti sadrži 115 kratkoročnih prioriteta, na osnovu kojih je Vijeće ministara Bosne i Hercegovine pripremlilo 729 mjera koje trebaju realizirati svi nivoi vlasti u Bosni i Hercegovini. S tim u vezi, podržavamo činjenicu da je Vijeće ministara BiH na 18. sjednici održanoj 22.10.2020. godine usvojilo Finalni izvještaj o realizaciji Akcionog plana za realizaciju prioriteta iz Analitičkog izvještaja Evropske komisije, ali zabrinjava podatak da je 42% mjera realizirano, a da 58% mjera nisu realizirane. Nažalost, jedna od mjera iz Analitičkog izvještaja Evropske komisije koja do danas nije realizirana jeste mjera pod tačkom 69.1. koja glasi: „Izraditi prvi nacrt Integrisanog energetskog i klimatskog plana BiH (NECP)“ u okviru poglavlja koje se odnosi na državno i entitetsko zakonodavstvo u oblasti obnovljive energije i energetske efikasnosti u skladu s obavezama koje proizlaze iz Ugovora o uspostavljanju Energetske zajednice. Ovo pitanje u nadležnosti je Ministarstva za vanjsku trgovinu i ekonomske odnose BiH, a rok realizacije iz Akcionog plana bio je „maj 2020. godine“, te ova inicijativa ima upravo za cilj potrebu da se apeluje na Vijeće ministara BiH i nadležno ministarstvo o potrebi realizacije ove obaveze.

U novembru 2016. godine usvojen je prijedlog Uredbe Evropske komisije kojom se utvrđuju obaveze država članica da izrade Nacionalne integrisane energetske i klimatske planove (NECP) za period od 2021. do 2030. Bosna i Hercegovina, kao aspirant za članstvo u Evropskoj uniji, također ima obavezu da izradi ovaj Plan<sup>1</sup>. Navedena Uredba Evropske komisije odnosi se na pet dimenzija Energetske unije i to: energetska sigurnost, energetske tržište, energetska efikasnost, dekarbonizaciju i istraživanje, inovacije i konkurentnost. Nacrt Integriranog eneretskog i klimatskog plana BiH (NECP) treba da prati upravo tu strukturu. Nadalje, Energetska zajednica, čiji član je i Bosna i Hercegovina, je u januaru 2018. godine usvojila Preporuke za pripremu razvoja Integriranih energetskih i klimatskih planova od strane ugovornih strana Energetske zajednice. To znači da imamo dvostruku međunarodnu obavezu za izradu i usvajanje ovog dokumenta (Uredba Evropske komisije iz 2016. godine i Smjernice Energetske zajednice iz 2018. godine). Predmetni nacionalni energetski i klimatski planovi bi trebali imati za cilj da do 2030. godine ispune tri cilja i to: da se poveća korištenje obnovljivih izvora energije u ukupnoj energetskej potrošnji (32% do 2030. godine), da se poveća energetska efikasnost (32,5% do 2030. godine) i da se smanje emisije stakleničkih gasova (40% do 2030. godine). Navedeni ciljevi postavljeni su u skladu sa okvirom postavljenim Pariškim sporazumom o klimatskim promjenama (UNFCCC) iz 2015. godine i Smjernicama Sekretarijata Energetske zajednice. Koristi koje Bosna i Hercegovina ima od usvajanja ovog dokumenta nisu vezane samo za pitanje zaštite okoliša, već i za rast investicija, kao i smanjenje administrativnog opterećenja u skladu s energetskim politikama Energetske zajednice i Evropske unije.

S poštovanjem,

  
Dr. Denis Zvizdić

---

<sup>1</sup> Poređenja radi Republika Hrvatska već ima usvojen Prvi Nacrt Integriranog eneretskog i klimatskog plana za razdoblje od 2021. do 2030. godine, sačinjen od strane Ministarstva zaštite okoliša i energetike. [https://ec.europa.eu/energy/sites/ener/files/documents/croatia\\_draftnecp\\_hr.pdf](https://ec.europa.eu/energy/sites/ener/files/documents/croatia_draftnecp_hr.pdf)